

**ՀԱՅ ԱՌԵՎՏՐԱԿԱՆ ԴԱՍԻ ՄԱՍՆԱԿՑՈՒԹՅՈՒՆԸ
ԱՌԵՎՏՐԻ ԿԱՐԳԱՅՄԱՆԸ ՕՍՄԱՆՅԱՆ ԿԱՅՄՐՈՒԹՅՈՒՆՈՒՄ՝ (XIX դ.)**

ՎԱԼԵՐԻ ՂԵՑՁԱՆ

Օսմանյան կայսրության պատմության դեռևս անբավարար ուսումնասիրված պրոբլեմներից են երկրի սոցիալ-տնտեսական զարգացման առանձնահատկությունները և ընդհանրությունները՝ համեմատած առաջընթացի դասական ձևերի հետ: Ծիշտ է, վերջին ժամանակներս լույս են տեսել սովետական արևելագետների մի շարք արժեքավոր աշխատություններ¹, որոնցում փաստորեն առաջին անգամ համակարգվեցին զարգացման ընդհանուր օրինաչափությունները, առաջ քաշվեցին կարևոր հարցադրումներ, կատարվեցին լուրջ ընդհանրացումներ, սակայն անևրիքները դեռևս շատ են: Դրանց թվում է Օսմանյան կայսրությունում Թանզիմատի շրջանում առևտրական կապիտալի, առևտրական կապերի, ներքին և արտաքին առևտրի վիճակի և զարգացման ուսումնասիրումը: Մեր նպատակն է՝ գլխավորապես հայ առևտրական կապիտալի օրինակով ցույց տալ կայսրությունում առևտրի զարգացման մի քանի բնորոշ առանձնահատկություններն ու նոր կողմերը անցյալ դարի կեսերին:

Առևտրի բնույթի, ձևերի և ընթացքի փոփոխությունները պայմանավորված էին ներքին և արտաքին մի շարք գործոններով: Սոցիալ-տնտեսական զարգացման հետևանքով XVIII դ. վերջին և XIX դ. սկզբներին Բալկաններում, Փոքր Ասիայում և կայսրության այլ մասերում սկսեցին ձևավորվել կապիտալիստական հարաբերություններ: Սոցիալ-տնտեսական վերափոխումներն օբյեկտիվորեն նպաստում էին ապրանքադրամական հարաբերությունների զարգացմանը և կապիտալի կուտակմանը: Բացի այդ տեղի էին ունենում մի շարք դրական քաղաքական տեղաշարժեր, որոնք բարեբար ազդեցություն էին թողնում ներքին առևտրի և ապրանքաշրջանառության աճի վրա: Նման տեղաշարժերից էին Փոքր Ասիայում քաղաքական կացության համեմատական կայունացումը, Թանզիմատի ազդեցությունը տնտեսության մեջ ընդհանրապես, առևտրի մեջ մասնավորապես: Հնդկայնվում էին առևտրի ոլորտները. ծովափնյա մասերից բացի՝ աստիճանաբար ներքին և համաշխարհային ապրանքաշրջանառության մեջ էին ներքաշվում տեղական շուկաները: Առևտուրը, ըստ էության, սկսում էր ընդգրկել սոցիալական բոլոր խավերին, և, որ գլխավորն է, հեռանում էր տուր և առի նահապետական մեթոդներից: Սակայն առևտրական կապիտալը գլխավորապես ֆեոդալական բնույթ ունեւր և գործում էր քայքայվող, բայց տիրապետող ավատատիրական հարաբերությունների պայմաններում: XIX դ. առաջին կեսերին Օսմանյան Թուրքիայում հայ առևտրական կապիտալը ներքին շուկայում միջնորդ դեր էր խաղում՝ առանձին արտադրողների միջև, որի հետևանքով առևտրականը դառնում էր անմիջական արտադրողների՝ գյուղացիների և արհեստավորների շահագործող կողմ: Պա ապահովում էր կապիտալի կուտակումը: Ապրանքաշրջանառության ոչ բավարար զարգացումը, տեղական շուկաների միմյանցից կտրվածությունը, միևնույն ապրանքի գների բազմազանությունը, ինչպես նաև մի շարք այլ տնտեսական ու արտատնտեսական գործոններ «առևտրական միջնորդներին հնարավորություն էին տալիս ստանալ վիթխարի շահույթ»²: Փոքր Ասիայում շրջանառու-

¹ О. Г. Ивджиян, Буржуазия Османской империи, Ереван, 1977; И. Л. Фадеева, Османская империя и англо-турецкие отношения в середине XIX в., М., 1982; А. Д. Новайчев, История Турции, т. 2—4, Л., 1968—1978 и др.

² «Экономическая энциклопедия», т. 4, М., 1980, с. 156.

թյան մեջ գտնվող առևտրական կապիտալը տվյալ ժամանակաշրջանում հենց այդպիսի դեր էր կատարում։ Աղբյուրների ժխտ տեղեկությունները հնարավորություն չեն տալիս ճշտությամբ որոշելու ներքին առևտրի մեջ ներդրվող կապիտալի չափերը, բայց որոշ տվյալների հիման վրա կարելի է այդ մասին պատկերացում կազմել։ Այսպես, 1827 թ. դեկտեմբերի 11-ին Կարապետ արքեպիսկոպոսին առևտրական Աղաջան Հայրապետյանի Բիթլիսից գրած նամակից երևում է³, որ նա առևտուր էր անում եղբոր հետ ընկերացած և որ նրանց դրամագլուխը կազմում էր 150000 ղուռուշ։ Թոքատցի վաճառական Հովհաննես Կետիկյանի 1818 թ. կատարած մի առևտրական գործարքի արժեքը կազմում էր 10000 ղուռուշ⁴։ Կ. Պոլսում էրզրումցի վաճառական Պապո Գաբրիելյանը 1824 թ. միանգամից գնում է 4000 ղուռուշի ապրանք՝ գավառներում վաճառելու համար⁵։ Բոլոր գործառնությունները կատարվում էին առձեռն դրամով, և, ինչպես տրտնջում էր Ստեփանոս անունով մի վաճառական, մինչև ձեռքիդ «փարա» չտեսնեն, ապրանք չեն տա⁶։ Առևտուրն իրենց ձեռքում պահելու համար վաճառականները ոչ մի միջոցի առաջ կանգ չէին առնում։ Իրա համար նրանք հաճախ գործարքի մեջ էին մտնում իշխող վերնախավի հետ, որի հետևանքով անմիջական արտադրողների շահագործումն ուժեղանում էր⁷։ Առևտրականը, իր ձեռքում ունենալով իշխանության թույլտրվությունը, շահույթն ապահովելու համար ապրանքը գնում էր ցածր գներով⁸, բայց վաճառում էր առավելագույն արժեքով։ Այդ պատճառով երկրի տարբեր շուկաներում գների մեծ անհամամասնություն էր առաջանում։ Բացի այդ, տարեցտարի այս կամ այն ապրանքի առևտրի թուլությունը համարվե՞նք մեծ գումարը մեծությամբ էր, որի հետևանքով աճում էին նաև շուկայական գները։ Այս երևույթը տարածված էր նաև պետական մենաշնորհ հանդիսացող հացահատիկի, բրդի և այլ ապրանքների առևտրում։ Վաճառականը, հաճախ, բացի առևտրից, զբաղվում էր սեղանավարությամբ և վաշխառությամբ, 1827 թ. մի փաստաթղթից կարելի է տեղեկանալ, որ Կ. Պոլսում էրզրումցի վաճառականները զբաղվում էին նաև պարտավորահաններ տալով, որը մեծ շահույթներ էր բերում⁹։ Իսկ սեղանավորը, գործարքի մեջ մտնելով տեղի իշխանության հետ, պարտքի դիմաց երբեմն վերցնում էր ապրանք, նշանակում կամայական գին և դիզում հսկայական հարստություն¹⁰։

Այսպիսով, Փոքր Ասիայի առևտրում գործող առևտրական կապիտալն ուներ ավատական բնույթ, որը բխում էր Օսմանյան Թուրքիայի սոցիալ-տնտեսական և քաղաքական կարգերից։ Այդ կարգի պահպանումը խանգարում էր առևտրի բնականոն զարգացմանը, սակայն, ինչպես Կ. Մարքսն է նշում, «Կապիտալի ոչ մի տեսակը չի կարող իր կոչումը, իր ֆունկցիան փոխել ավելի մեծ հեշտությամբ, քան այդ կարող է անել վաճառականական կապիտալը»¹¹։ Վերը նշված պատճառներով անցյալ դարի կեսերին հայ առևտրական բուրժուազիայի գործառնություններում նկատվում էին նոր կողմեր, որոնք բխում էին առևտրական կապիտալի բուրժուականացումից։ Ի՞նչ ասել է առևտուր, ինչպե՞ս պետք է առևտուր անել թեման դարձել էր անցյալ դարի կեսերի Օսմանյան և հատկապես հայկական մամուլի քննարկման առարկան։ Այն ժամանակվա հայկական մամուլի առանձին օրգաններ հրատարակվում էին առևտրա-

3 Մ. Մաշտոցի անվան Մատենադարան, Կարապետ արքեպիսկոպոսի արխիվ, Թղթ. 163դ., վավ. 1044։

4 Նույն տեղում, կաթողիկոսական դիվան, Թղթ. 32, վավ. 39։

5 Նույն տեղում, Կարապետ արքեպիսկոպոսի արխիվ, Թղթ. 163բ, վավ. 743։

6 Նույն տեղում, վավ. 703։

7 (М. Вронченко), Обзорение Малой Азии в ее нынешнем состоянии, составленное русским путешественником (այսուհետև՝ «Обозрение Малой Азии»), ч. I, СПб., 1839, с. 146.

8 Նույն տեղում, էջ 253։

9 Մատենադարան, Կարապետ արքեպիսկոպոսի արխիվ, Թղթ. 163դ., վավ. 988։

10 «Обозрение Малой Азии», ч. I, с. 264.

11 Կ. Մարքս, Կապիտալ, 4. 3-րդ, մաս 1, Երևան, 1947, էջ 266։

կան բուրժուազիայի ներկայացուցիչների ջանքերով և նպատակ ունեին հնարավոր բոլոր միջոցներով նպաստել առևտրի զարգացմանը: Զմյուռնիայում լույս տեսնող «Արշալույս արարատյան» թերթն առաջին իսկ համարի առաջնորդողում իր գլխավոր խնդիրն էր համարում ընթերցողներին ծանոթացնել առևտրական անցուղարձին¹²: Ոման նիքոլա Փեժեր ևս իր հրատարակվելիք «էնտիքաթեոր քոթիդեն» թերթի նպատակը նույնն էր համարում: «Արշալույս արարատյանում» նա գրում էր, որ իր թերթը պետք է լույս տեսնի ամեն օր, ժամը 10-ին և ծանուցի, թե ցամաքով որսնդից ինչքան ապրանք է բերվել իգմիր, ո՞վ է դրանց տերը, ո՞ւմ է հանձնվել: Այն պետք է նաև տեղեկություններ պարունակի նավահանգիստ մտած նավերի բերած ապրանքների, փոխանակության, դրամի գների մասին և այլն¹³: Զափաղանցություն չի լինի ասել, որ XIX դ. 40—70-ական թվականներին Օսմանյան կայսրությունում լույս տեսած պարբերականների մեծագույն մասի բովանդակությունն այս կամ այն չափով առնչվում էր առևտրի հետ և ֆինանսավորվում էր առևտրական կապիտալի կողմից: Մամուլը դառնում էր ոչ միայն առևտրուր պրոպագանդող, այլև դրա ընթացքն ու պայմանները քննող, մեկնաբանող, կանխատեսումներ կատարող, առևտրական կապիտալի իդձերն արտահայտող միջոց:

Օսմանյան կայսրությունում ապրանքաշրջանառության զարգացման այս նոր փուլում բնորոշ է դառնում նաև առևտրի նկատմամբ գիտական մոտեցումը, որը դրսևորվում էր հունական, հրեական, հայկական առևտրական դրամատիկների գործունեության մեջ: Այս առումով հետաքրքիր է Ղ. Տերտերյանցի աշխատությունը¹⁴, Առաջաբանում հեղինակը նշում է, որ բոլոր բնագավառներում, այդ թվում և վաճառականության մեջ, պետք է հասնել եվրոպացիներին: Նա առևտրի զարգացման հիմնական պայմաններն էր համարում պետության գործարար, գործի միջոցառումները և վաճառականների «գիտությունն ու ուսումը»: Ղ. Տերտերյանցի կարծիքով հարկավոր էր առևտրի մասին գրքեր գրել, հատուկ դպրոցներ բացել, եղած դպրոցների ծրագրերում առևտրին ուսուցանող առարկաներ մտցնել¹⁵: Լուսավորական գաղափարներով տոգորված այս մտքերն արտահայտում էին հայ առևտրական բուրժուազիայի այն ժամանակվա առաջադեմ մասի տրամադրությունները: Ղ. Տերտերյանցի աշխատությունը մեծ աղժեք ունի նաև այն պատճառով, որ նա աշխատել է առևտրի պրոպագանդային շափ տեղայնացնել՝ վերլուծելով Օսմանյան կայսրության պայմանները, նշելով արևելյան առևտրի ստվերոտ կողմերը, գծելով դրա զարգացման ճշմարիտ ուղիները: Այսպես, շխրախուսելով վերավաճառությունը, նա խստորեն պարսավում էր առևտրի մենաշնորհը, գիտակցելով, որ Թուրքիայում այն շատ է տարածված¹⁶: Հեղինակի խորին համոզմամբ առևտրի առաջընթացի գլխավոր ուղին տեղական արդյունաբերության զարգացումն է¹⁷:

Առևտրի պատմությամբ հաճախ դբաղվում էին հենց առևտրականները: Դրա բնորոշ օրինակը Հ. Հովակիմյանն է, որն իր գիտական գործունեության համար «հայ վաճառականներու Պապա նահապետը կկոչվեն»¹⁸: Նա ֆրանսիերենից թարգմանած գրքի առաջաբանում նշել է, որ խորապես ուսումնասիրել է առևտրական գործը և գտել, որ անհրաժեշտ է սոսկ մանրավաճառ «վաճառականության միջնորդ» լինելուց այն կոչմանցնել ու զարգացնել տեղա-

12 «Արշալույս արարատյան», 10. VIII. 1840:

13 Նույն տեղում, 8. V. 1842:

14 Ժխտություն վաճառականության, հորինեց Հ. Ղուկաս Տերտերյանցի Մխթ. ուխտեն, Վիննա, 1848:

15 Նույն տեղում, էջ I—V:

16 Նույն տեղում, էջ 236:

17 Նույն տեղում, էջ 240—254:

18 Հ. Գ. Մ [ըրմըրյան], Թուրքահայոց հին վաճառականությունն ու վաճառականը, 1740—1890, Կ. Պոլիս, 1908, էջ 26:

կան առևտուրը Կ. Պոլսում և մյուս վայրերում¹⁹։ Այդ գաղափարի պրոպագանդումն էլ նա համարում է վերոհիշյալ գրքի թարգմանության շարժառիթը։

Առևտրի նկատմամբ լուրջ վերաբերմունքի մի վկայություն է նաև Ֆրանսիացի Սենյի «Քաղաքատնտեսություն» գրքի թուրքերեն թարգմանությունը։ Այդ գրքի թարգմանիչ Ս. Ապրոյանն այն փորձ-ինչ ընդարձակել է և օրինակները բերել Օսմանյան կայսրությունից, որի հետևանքով գիրքը թուրքիայում դարձել էր գործածական²⁰։

Առևտրի հետ կապված խնդիրների քննարկումը մամուլի ամենօրյա հոդվածներից էր։ Շատ առևտրականներ, նշում էր Զմյուռնիայի հայկական թերթերից մեկը, հաշվեմատյան պահել չգիտեն, չեն տիրապետում կրկնատոմսով վաճառականության կանոններին, մինչդեռ չափահաս աշակերտը դա կարող է սովորել 3—4 ամսվա մեջ։ Թերթը հարց էր բարձրացնում դպրոցներում դասավանդել այդպիսի առարկա²¹։ Արդեն 1860-ական թվականներին քիչ չէին այնպիսի մեծահարուստ վաճառականները, որոնք հսկայական միջոցներ էին կտակում առևտրական դպրոցներ բացելու համար։ Այսպես, օրինակ, 1867 թ. մեծահարուստ առևտրական Բյուզանդ Քարակյոզյանի կտակի համաձայն նրա միջոցներով (45000 լիրա) պետք է Կ. Պոլսում կառուցվեր առևտրական դպրոց, որի ընդհանուր տնօրինությունը պետք է իրագործեր 7—8 վաճառականներից բաղկացած խորհուրդը՝ Քարակյոզյան գերդաստանի անդամներից մեկի նախագահությամբ։ Այն պետք է հոգար նաև դպրոցի շրջանավարտներին աշխատանքի տեղավորելու հարցը²²։ Այս մասին վկայում է նաև Կ. Պոլսի ներսես պատրիարքը՝ 1875 թ. դեկտեմբերի 5-ին կաթողիկոսին գրած նամակում²³։ Կաթողիկոսի 1876 թ. ապրիլի 25-ի կոնդակից տեղեկանում ենք, որ սուլթանը թույլատրել է կառուցել այդ առևտրական դպրոցը²⁴։ Հայտնի դրամատիկ Օնիկ Տյուզյանը Կ. Պոլսի Միջագուղի հայոց դպրոցին 2000 լիրա էր նվիրել, որպեսզի այդ միջոցներով աշակերտներն առևտրական գիտություն ուսումնասիրեն²⁵։ Կ. Շահնազարյանը մի առիթով նշում էր, որ «վաճառականություն ըսելով առուծախք չեն ուզեր ըսել և ոչ 5 փարայով գնածն 6 փարայի վաճառելն...», —ասիկա խանութպանություն է»²⁶։ Նա կոչ էր անում տիրապետել առևտրական գիտությանը և վերջինս ուսումնասիրել այնպես, ինչպես քերականությունը, մաթեմատիկան։

Այս ամենը վկայում են, որ հայկական առևտրական կապիտալի ներկայացուցիչները խորն էին ըմբռնում տնտեսական զարգացման նոր փուլում առևտրի դերն ու նշանակությունը։ Դրա լավագույն ապացույցը նաև Թանգիմաթի առաջին շրջանից սկսած լայն շափերով բուրժուական առևտրական ընկերությունների ձևավորման պրոցեսն էր, որը սկսեց տիրապետող դառնալ ներքին առևտրում, դարձավ շահույթով առևտուր անելու, գործարարության կարևոր օղակներից մեկը։

Առևտրի զարգացման պատմական անհրաժեշտությունը ստիպում էր այն ընդլայնել։ Մանրածախ առուցընթացին զուգընթաց, ավելի ու ավելի էր հզորանում մեծածախ առևտուրը, որը պահանջում էր խոշոր կապիտալ ներդրումներ։ Ընդ որում, Օսմանյան կայսրությունում դա այնքան էլ պարզ պրոցես չէր, ինչպես կարող է թվալ առաջին հայացքից։ Այն բարդանում էր կրոնական, ազգային, քաղաքական, արտաքին, ինչպես նաև բուրժուական հարաբերությունների առաջացման շրջանին հատուկ մի շարք սոցիալ-տնտես-

19 «Պատմություն նախնայաց վաճառականության և ճանապարհ հարստության», թարգմ.

2. Հոգևորական, Փարիզ, 1860, էջ 21

20 «Նոյան աղավնի», 6. III. 1852:

21 «Հայրենասեր», 30. III. 1845:

22 «Արշալույս արարատյան», 14. VII. 1875:

23 Մատենադարան, կաթողիկոսական դիվ., թղթ. 227, վավ. 208:

24 Նույն տեղում, վավ. 214:

25 «Արշալույս արարատյան», 21. X. 1872:

26 «Երկրագունդ», 14. VI. 1864:

սական գործոններով: Այդ պրոցեսի դարգացման մեջ առաջին հերթին աչքի էր ընկնում օսմանյան բուրժուազիայի ազգային խայտաբղետությունը: Ազգային ինքնաճանաչման պրոցեսում սկսվում էին նոր ժամանակներ, որոնց դրսևորման ասպարեզներից մեկն էլ առևտուրն էր: Եվ ոչ աստահական չէ, որ առևտրական ընկերությունները կազմավորվում էին նախ և առաջ ազգային հատկանիշներով:

Առևտրական ընկերությունների ստեղծումը 1840-ական թվականներից լայն չափեր էր ընդունել ն.ս. հայերի մեջ: Հայկական առևտրական ընկերությունները գործում էին գլխավորապես Փոքր Ասիայում և կապված էին ներքին շուկայի հետ: Այդպիսի ընկերություններ էին ստեղծվել Կ. Պոլսում, Տրապիզոնում, Զմյուռնիայում, Նիկոմեդիայում, Կեսարիայում, Ադանայում, Ուշաքում և այլ քաղաքներում ու գյուղաքաղաքներում: XIX դ. վերջին և XX դ. սկզբներին դրանց կառուցվածքը և կազմակերպչական ձևերը կապիտալիստական հարաբերությունների դարգացման հետևանքով րավականին բարդացել էին²⁷, 1843 թ. Կ. Պոլսում հիմնադրվում է «Արամյան ընկերությունը», որն ուներ 200 բաժին՝ 100000 ղուռուշ գրամագլխով: Յուրաքանչյուր մասնակից հինգ բաժնից պել չէր կարող գնել: Ընկերությունը պետք է զբաղվեր դրամավորապես սուրճի, շաքարի, օճառի, մոմի, պանրի, խավիարի, կարագի և այլ առաջին անհրաժեշտության ապրանքների առևտրով: Փայտոտերերը պետք է միայն հայ լինեին և առևտուր անեին սոսկ ընկերության միջոցով: Ստացված շահույթի 100-ից 5-ը պետք է օգտագործվեր ազգօգուտ գործերի համար²⁸, «Առևտրական ընկերություն հայոց» անունով նման մի ընկերություն հիմնադրվում է Կ. Պոլսում՝ 1847 թ.²⁹:

Հետաքրքիր է «Առևտրական ընկերություն սեպուհյան» միության ստեղծումն Ադաբաղարում³⁰, 1852 թ. մայիսի 1-ից վեց արհեստավոր և առևտրական երիտասարդներ առանց դրամագլխի ստեղծում են հիշյալ ընկերությունը: Հիմնադրման օրից յուրաքանչյուր ընկեր օրական 40 փարա էր մուծում գանձարկղը: Օրավոր հավաքած գումարը շրջանառության մեջ դնելով նրանք մեկ տարում ստանում են 10000 դահեկան շահույթ և որոշում ընդարձակել առևտրական գործառնությունները: 1853 թ. առևտրական ընկերություն է ստեղծվում նաև Հայեպում: Ընկերության կապիտալի մեծ մասը պատկանում էր Մարգրիս և Հովհաննես Միսաքյաններին³¹,

ներքին առևտրով զբաղվող հայկական մանր առևտրական ընկերությունները հետզհետե ամրապնդվում էին և մեծ չափերի հասցնում իրենց միջոցով կատարվող ապրանքադրամական շրջանառությունը: Արդեն 1860-ական թվականներին այդպիսի ընկերություններ էին դարձել Հերմեսյան, Արամյան, Խնայողական, Ոսկերչական, Հայկազյան առևտրական բաժնետիրական միությունները: Հերմեսյան ընկերությունը, օրինակ, ուներ 31 փայտտեր և պատկառելի դրամագլուխ³², Այս ընկերությունները ճյուղավորված էին Կ. Պոլսում և Փոքր Ասիայի այլ քաղաքներում:

Առևտրական ընկերություններ էին ստեղծում նաև հուլյներն ու հրեաները: Հայ առևտրական կապիտալի ջատագովները հաճախակի էին տրտնջում, որ հուլյներն այդ գործում հայերից շատ են առաջ անցել և որ Եվրոպայում հայ վաճառականները երբեմնի փառքը չունեն³³, եվ քանի որ դրա համար մեծ կապիտալ էր պետք, ապա ելքը փնտրում էին բաժնետիրական ընկերություններ: ստեղծման մեջ³⁴, Արդեն XIX դ. կեսերին Կ. Պոլսի, Զմյուռնիայի և Կեսա-

²⁷ Օ. Գ. И н д ж и к я н, Ելվ. աշխ., էջ 110—111:

²⁸ «Արշալույս արարատյան», 15. V. 1843:

²⁹ Նույն տեղում, 25. VII. 1847:

³⁰ «Հայրենասեր», 15. VI. 1853:

³¹ «Արշալույս արարատյան», 3. VII. 1853:

³² Նույն տեղում, 24. XII. 1866:

³³ Նույն տեղում, 25. VII. 1847, 13. X. 1850, 12. X. 1851:

³⁴ Նույն տեղում, 13. X. 1850:

րիայի հայ վաճառականական կապիտալի ներկայացուցիչները, կազմելով տարբեր ձևերի առևտրական ընկերություններ, աստիճանաբար ներգրավվեցին եվրոպական մեծածախ առևտրի մեջ։ Դա ամենից առաջ վերաբերվում է Անգլիային, որտեղ հայկական գաղութի առաջացումը կապված էր համաշխարհային ապրանքաշրջանառության զարգացման հետ։ Անգլիայի հայկական գաղութն իր պատմությունը սկսում է հենց այդ ժամանակաշրջանից³⁵։ Երևի Անգլիայում առաջանում է մեծ կարողությունների տեր հայ վաճառականների մի հզոր խումբ, որի անգամների թիվը XIX դ. 60-ական թվականների սկզբին 30-ից անց էր³⁶, իսկ մեծ տասնամյակ անց հասավ 50-ի³⁷։ Ի տարբերություն Օսմանյան կայսրությունում գործող ընկերությունների, այս առևտրական միությունները որպես կանոն ստեղծվում էին ազգակցական, արյունակցական համագործակցության հիման վրա։ Ինչ վերաբերվում է փայտտրական առևտրական մեծ ընկերություններին, ապա դրանց ստեղծման մի քանի փորձերն անհաջողությամբ վերջացան³⁸։

XIX դ. 40-ական թվականներից սկսած Օսմանյան կայսրությունում ներքին ապրանքաշրջանառության զարգացման հետևանքով զուգահեռաբար սկսում է զարգանալ նաև տեղական առևտրական բուրժուազիան, որը 1860—70-ական թվականներին արդեն զգալի տեսակարար կշիռ ուներ³⁹։ Ներքին շուկայի հետ կապված այս բուրժուազիայի զարգացումն անխուսափելիորեն պիտի հակասության մեջ մտներ օտար կապիտալի հետ։ Տեղական առևտրական բուրժուազիան, զրկված լինելով անգամ պետական պաշտպանությունից, չէր կարող վճռական պայքարի մեջ մտնել օտար կապիտալի դեմ։ Ժամանակի հայկական մամուլում այս մասին կարելի է հանդիպել խուլ բողոքների և պայքարի սքողված կոչերի։ Այսպես, «Եվրոպա» թերթը գրում էր. «Յառաջացե՛ք ձեր շահով, կկանչե՛ն Նվրոպա, ապա թե ոչ կառաջացնե՛մ իմ շահովս»⁴⁰։ «Արաբածուկյաց ընկերության» «Հայրենասեր» թերթն օտար առևտրականների դեմ պայքարելու ճիշտ ուղին համարում էր տեղացի առևտրականների համախմբումը, միմյանց վարկի պահպանումը, համակողմանի օգնությունը, հավատարմությունը, փոքր գործառնություն անող առևտրականների շահերը պաշտպանելը և այլն⁴¹։ Անգամ Մանչեսթրում լույս տեսնող «Երկրագունդ» գրաշատնում էր, որ չպետք է թույլ տալ, որ Օսմանյան կայսրությունում գործը հասնի այնպիսի աստիճանի, ապա օտարներն առևտրական գործառնություններին լրիվ տիրեն⁴²։ Նույն խնդրին անդրադառնալով, Ա. Նրիցյանը պարսավում է Անգլիայի աղատ առևտրի քաղաքականությունը, հենց դա էլ համարելով տեղական առևտրի զարգացմանը խանգարող հանգամանք⁴³։ Հաճախ տեղացի, այդ թվում և հայ առևտրականները ճակատ էին կազմում՝ ապրանքների գները բարձր պահելու համար, բայց միշտ չէ, որ դա հաջողություն էր ունենում⁴⁴։ 1858 թ. հոկտեմբերի 12-ին գրած նամակում Զմյուռնիայի օսմանյան վաճառականության ներկայացուցիչ Գ. Ապրոյանը մեծ վեղիրին շնորհակալություն էր հայտնում մի առիթով տեղական առևտրականներին պաշտպանելու համար։ Նամակի հեղինակը գտնում էր, որ Բ. Դուռը և տուլթանը պարտավոր են օսմանյան վաճառականությանը պաշտպանել օտար

35 Մ ու շ ի ղ ե պ ի ս կ ո ս ո ս, Մանչեսթրի հայ գաղութը, Պոստոն, 1911, էջ 12—13։

36 «Արշալույս արարատյան», 4. V. 1853։

37 Նույն տեղում, 22. VII. 1867։

38 Մ ու շ ի ղ ե պ ի ս կ ո ս ո ս, նշվ. աշխ., էջ 17։

39 Հ ա յ լ Ղ ո ղ ա ռ յ ա ն, Արևմտահայերի սոցիալ-տնտեսական և քաղաքական կացությունը 1800—1870 թթ., Երևան, 1967, էջ 330։

40 «Եվրոպա», 11. IV. 1857։

41 «Հայրենասեր», 30. VI. 1843։

42 «Երկրագունդ», 14. VI. 1864։

43 «Վաճառական», 15. V. 1866։

44 «Արշալույս արարատյան», 29. VII. 1841։

առևտրականներից, հոգ տանել նրա զարգացման համար⁴⁵, «Երկրագունդ» թերթում լույս տեսած «Օսմանյան կայսերական բանկ» հոդվածի հեղինակը (Մ. Թ. ստորագրությամբ) այս առումով կատարում է մի շատ հետաքրքիր դերում: Ըստ նրա, տեղական դրամատերերը օսմանյան կայսերական բանկի հետ, որտեղ տիրում էր օտար կապիտալը, ավելի շատ ստիպված են համագործակցում, քան թե կամավոր⁴⁶:

Տեղական բուրժուազիայի դրամական, արդյունաբերական գործառնությունների ընդլայնման հակումը հատկապես ուժեղանում է Թանզիմաթի հենց սկզբից: Իրավական խախուտ դրության որոշ կայունացումը և տնտեսության բոլոր ոլորտներում առաջադիմական օրենսդրության փորձերն առևտրականների սկսում էին որոշակի հույսեր ներշնչել: Հայ առևտրական կապիտալի ներկայացուցիչներից շատերը հենց այս շրջանում սկսեցին իրենց կապիտալը ներդնել արդյունաբերության մեջ, փորձեցին ստեղծել եվրոպական տիպի ֆաբրիկաներ: Այդ հարցը դարձավ քննարկման առարկա, հրատարակվեցին բազմաթիվ հոդվածներ, աշխատություններ: Հատկապես հետաքրքիր է Ե. Զաֆյանի աշխատությունը, որը երեք անգամ հրատարակվել է⁴⁷, Հեղինակը նշում էր, որ իր նպատակն ազգի «իրական շահի և օգտին» նպաստելն է: Գրքի 37 գլուխներում մանրամասն նկարագրելով գինու, սոսնձի, օճառի, վառողի, ապակու, հայերու և բազմաթիվ այլ ապրանքների արտադրության պրոցեսը, հեղինակն ընդգծում է, որ միայն գործարարությունը կրերի մեծամեծ շահույթ⁴⁸: Ըստ նրա, վաճառականությունը «գլխավորաբար արվեստով կկենա, որովհետև եթե արհեստավորը չպատրաստե, վաճառականն իր առևտուրին համար շատ քիչ նյութ կգտնե»⁴⁹:

Գործնական մեծ նշանակություն ունեցան մետաքսագործության վերաբերյալ հրապարակումները: Թանզիմաթյան օրենսդրության հեղինակներից մեկի՝ Ռեշիդ փաշայի մերձավոր օգնական և գիտնական Հակոբ Կոճիկյանը, մետաքսագործության զարգացման մասին հանդես է գալիս հոդվածաշարով⁵⁰, 1830-ական թվականներին Ռեշիդ փաշայի հետ Եվրոպայում լինելով դիվանագիտական աշխատանքի մեջ, նա հսկայական նյութ էր հավաքել այդտեղի մետաքսագործության մասին: 1843 թ. նա Բուրսա է այցելում, որտեղ մետաքսագործության մասին հայերեն գիրք է գրում: Եվ որովհետև այն ոչ բոլոր բուրսացիներին էր հասկանալի, նրա բարեկամներից մեկը՝ Զեվդեթը, գիրքը թարգմանում է թուրքերեն⁵¹: Հ. Կոճիկյանի գիրքը հայերեն լույս է տեսնում 1846 թ.⁵²: Պակաս կարևոր չէ այն փաստը, որ այդ գիրքը հրատարակվել է առևտրական և սեղանավոր Ճեզայիրլյան Մկրտիչ ամիրայի պատվերով ու ծախսով: Գիրքը 1849 թ. ուղարկելով Ներսիս Աղտարակեցուն, նա գրում է, որ այն հրատարակել է տվել «հայոց մետաքսագործոց լավ տեղեկություն տալու համար»⁵³: Ուստի պատահական չէ, որ հենց մետաքսագործությունը դարձավ օսմանյան և հատկապես հայ առևտրական կապիտալի գործառնության կարևոր բնագավառը: XIX դ. 40-ական թվականների կեսերին այդ կապիտալով ստեղծվում են մի շարք մանարաններ, որոնց մեծ մասն աշխատում էր շոգու ուժով: 1850 թ. Բուրսայում կար 4 մանարան (3-ը շոգեշարժիչով),

⁴⁵ Նույն տեղում, 31. X. 1858:

⁴⁶ «Երկրագունդ», 6. VII. 1864:

⁴⁷ Ե փ ի ն մ Վ. Զ ա գ ճ յ ա ն, Գործնական արվեստախոսություն կամ գլխավոր արվեստներու և անոնց դուրքին կերպով գործադրության առույննորդ, Վիեննա, Միխթ. տպարան, 1857. Նույնը՝ 1869 թ., Նույնը՝ 1884 թ.:

⁴⁸ Նույն տեղում, էջ 5:

⁴⁹ Նույն տեղում, էջ 4:

⁵⁰ «Արշալույս արարատյան», 12. VIII, 2. IX. 1844:

⁵¹ F. Dalsar. Türk sayayı ve Ticaret Tarhinde Barsada Ipekçilik, Istanbul 1960, s. 406.

⁵² Հ. Կոճիկյան, Մետաքսաբանություն կամ աղեկ մետաքս շինելու արհեստը, Կ. Պոլս, 1846:

⁵³ Մատենադարան, կաթողիկոսական դիվան, թղթ. 147, վաճ. 449:

որոնք ունեին 230 ավազան: Դրանցից 80-ը պատկանում էին հայերին⁵⁴: Տարեկան արտադրանքը կազմում էր 4.057.297 ղուռուշ: Հետևաբար, այդ գումարի մեկ երրորդից ավելին հայ նորելուկ արդյունաբերողներինն էր: Վերահիշյալ Մ. Ճեղայիրլյանն այստեղ ունի մի շոգեշարժիչով աշխատող մանարան, որը տարեկան արտադրում էր 6000 հոխա⁵⁵ գեղեցիկ մետաքս, օգտագործելով 80.000 հոխա հումք⁵⁶: Պիլեհիկի մոտ գտնվող մի գյուղում, որտեղ առատ ջուր կար, նա ջրի ուժով աշխատող մի այլ մանարան էլ է կառուցել տալիս⁵⁷, 1843 թ. Հ. Տյուղլյանը և Պ. Պիլեհիկճյանը ստեղծում են մի մեծ մանարան, որի ճախարակները Բուրսայում և նրա շրջակայքում տեղադրված էին հետևյալ կերպ. Բուրսայում՝ 20, Պիլեհիկում՝ 16, Ենիշեհիրում՝ 16, Կեմլեքում՝ 16, Սուհալըճում՝ 16, Պանտրամայում՝ 16, Ընդամենը 100 հատ: Հ. Տյուղլյանը Իտալիայից բերել է տալիս հատուկ վարպետ մանողների: 1845 թ. Պիլեհիկճյանն եղբայրները մի նոր մանարան են կառուցում, կից հատուկ շինություն, որտեղ պահվում և մշակվում էր հումքը: Այն գտնվում էր Բուրսայի Սեթ սյաշը թաղում, ունի 80 ճախարակ, 160 բանվոր և տարեկան արտադրում էր 4000 հոխա ընտիր մետաքս, օգտագործելով 50.000 հոխա հումք: Այս մետաքսաթելն օգտագործվում էր Հերեբեյի պետական կտորեղենի ֆարրիկայում, ինչպես նաև արտահանվում էր Լիոն, Լոնդոն և այլ տեղեր⁵⁸: Բուրսայում 1851 թ. փետրվարից սկսեց արտադրանք տալ նաև Հ. Պայյանի մանարանը, որի արտադրանքն ի ցույց դրվեց Լոնդոնի համաշխարհային ցուցահանդեսում և խախուսվեց մամուլում: Շոգեշարժիչը գործողության մեջ էր դնում 31 ճախարակ, որի օգնությամբ տարեկան արտադրվում էր 1800 հոխա մետաքսաթել, օգտագործելով 25.000 հոխա հումք⁵⁹:

Հայ առևտրական բուրժուազիայի յայսպիսի գործառնությունների մասին կարելի է բերել նաև այլ օրինակներ, որոնք ցույց են առնում, որ շատ թե քիչ բարենպաստ պայմանների գեպքում հայ առևտրական կապիտալը վերածվում էր անտեսության զարգացման հզոր խթանի:

УЧАСТИЕ АРМЯНСКОГО ТОРГОВОГО СОСЛОВИЯ В РАЗВИТИИ ТОРГОВЛИ ОСМАНСКОЙ ИМПЕРИИ (XIX В.)

ВАЛЕРИЙ ГЛЕЧАН

Резюме

В середине XIX в. в Османской империи наблюдалось интенсивное развитие торговли, способствующее формированию капиталистических отношений. Представители торговой буржуазии, в том числе и армянской, старались освоить европейские методы торговли и принять активное участие как во внутренней, так и во внешней торговле. В связи с этим в крупных торговых центрах Османской империи начали издаваться периодические издания, справочники и многочисленная литература по торговле и промышленности. Торговая буржуазия приобретала новые черты, образовались многочисленные торговые общества, делающие капиталовложения в разные отрасли экономики. Экономическое усиление местной буржуазии породило острые противоречия с иностранным капиталом.

⁵⁴ «Ենիքոպա», 22. VIII. 1850:

⁵⁵ Մեկ հոխան հավասար է 1285 գրամի:

⁵⁶ «Ենիքոպա», 12. VIII. 1851:

⁵⁷ «Հայրենասեր», 15. X. 1852:

⁵⁸ «Ենիքոպա», 4. XI. 1851:

⁵⁹ Նույն տեղում, 13. IV. 1852: